



ALERTA

Belun Nian Sistema Atensaun no Responde Sedu (AtReS)

INSIDENTE VIOLÉNSIA 28 AKONTESE IHA TEMPU KAMPAÑA ELEISAUN PARLAMENTAR, MASKE LADUUN SERIÚ (Dili, 21 Julju 2017)

Bazeia ba rezultadu monitorizasaun Belun liu husi Sistema Atensaun no Responde Sedu (AtReS)¹ ba insidente violénsia eleitorál ne'ebé akontese iha tempu kampaña eleisaun parlamentár hatudu iha maturidade polítiku ne'ebé aas husi povu nune'e la rejista insidente grave. Maske nune'e, Sistema AtReS mós rekolla insidente ne'ebé akontese durante konsolidasaun no tempu kampaña iha eleisaun parlamentár hamutuk insidente 28. Husi insidente 28 ne'e, iha insidente 13 mak uza forsa fíziku ne'ebé kauza ema na'in 11 hetan kanek (na'in 2 kanek grave tanba sona ho tudik). Insidente ho forsa fíziku halo ho maneira asalta malu, tuda malu no sona ho tudik. Insidente 6 estraga atributu partidu polítiku ni'an hanesan sunu no les bandeira no pamfletu. Insidente 6 estraga propriedade hanesan estraga uma, motor no karreta, no iha insidente seluk envolve violénsia verbal hanesan istori malu, tolok malu, haksasuk malu no hakilar malu.

Fatin akontese insidente violénsia eleitorál hirak ne'e mak iha Baukau akontese dala 7, Lautein dala 6, Vikeké dala 5, Dili dala 4, iha Aileu no Manufahi ida-idak akontese dala 2, iha Likisá no Ainaro ida-idak akontese dala 1.

Dadus hatudu katak, maioria insidente hirak ne'e akontese tanba:

- Militante halo provokasaun ba malu iha tempu kampaña, ne'ebé akontese insidente violénsia 23 (ezemplu: ho hatún malu, hakilar malu to'o balun tuda malu no baku malu);
- La-tuir regra kampaña nian. Insidente violénsia mós mosu ho número aas akontese iha estrada públiku (hamutuk insidente 9) tanba antes to'o fatin kampaña, iha estrada komesa ona hakilar no haklalak pior liu tan iha tempu kalan, liu ona oras kampaña ne'ebé provoka militante partidu seluk. Balun halo movimentu loron 1 antes, nune'e PNTL no F-FDTL hapara militante sira ho forsa; pesoál PNTL balun ho armas no farda kompletu halai tama ba klaran, fatin ne'ebé halo hela kampaña no to'o ikus hetan intervensaun husi lider partidu polítiku, akontese dala 1 no dala 1 tan pesoál PNTL estraga atributu partidu polítiku ni'an.

Rekomendasaun no Asaun Imediatu Antes Votasaun:

Eleisaun Parlamentár ne'ebé kompete husi 21 partidu polítiku, iha poténsia bele mosu konfliktu iha eleisaun 22 Julju 2017 (aban), tempu kontajen votu to'o anunsia rezultadu no forma governu foun, tanba ne'e Belun rekomenda ba:

- Polísia Nasionál Timor-Leste (PNTL) no F-FDTL atu mantén nafatin prioridade seguransa iha tempu votasaun no prosesu kontajen votu, to'o anunsia rezultadu no forma governu foun, liu-liu iha area sira ne'ebé sai hanesan risku ba konfliktu, nune'e prevene provokasaun no violénsia;
- Polísia Nasionál Timor-Leste (PNTL) no F-FDTL atu halo seguransa mos iha fatin públiku sira hanesan estrada no mantein seguransa iha postu seguransa sira ne'ebe estabelese ona;

¹ Sistema Atensaun no Responde Sedu (AtReS) kobre iha Postu Administrativu 43 (husi total 65), iha Suku 275 (husi total 442) iha Munisipiu 12 no Rejiaun Autonomia Espesiál Oekusi.



3. Lider partidu polítiku sira atu nafatin mantén militante sira hodi tuir prosesu demokrasia ne'e ho hakmatek no respeita lei ne'ebé vigora ona;
4. Husu ba partidu polítiku sira atu respeita malu no aseguira informasaun ba militante sira atu la-kria insulta malu no provoca malu iha tempu votasaun no kontajen votu;
5. Órgaun seguransa, STAE no CNE hodi mantén kooperasaun no kolaborasaun iha sentru votasaun atu votante sira partisipa ho konfortavel, livre husi intimidasaun;
6. CNE no parseiru dezenvolvimentu balun ne'ebé halo kna'ar observasaun iha tempu eleisaun hodi halo servisu imparcialidade, tuir prosesu votasaun no kontajen to'o remata no kobre area remota sira ne'ebé monta ona sentru votasaun;
7. Komunitade votante sira no partidu polítiku sira respeita prosesu demokrasia no prosesu polítiku ne'ebé hatuur ona iha konstituisaun RDTL no simu rezultadu eleisaun parlamentár 2017 no hamutuk fó konfiansa ba Partidu Polítiku ne'ebé forma governu tuir povu nia desizaun atu halo dezenvolvimentu iha Timor Leste.

Belun sei publika relatóriu monitorizasaun ho dados, análise no rekomendasaun ba eleisaun Parlamentár kompleta, iha tempu badak tuir mai.

Atu hetan informasaun liu tan favor, vizita Belun nia website foun kona-ba dados insidente violénsia iha www.atres.belun.tl. Bele mós kontaktu ba Jestor Sistema **AtReS Señora Marilia O. da Costa** iha bylah.belun@gmail.com.

Publikasaun ida ne'e konsege hala'o tanba hetan apoiu jenerozu husi Povu Amerikanu liu husi Ajénsia Estados Unidos ba Dezenvolvimentu Internasionál (USAID), Uniaun Europeia, UNDP, Governu RDTL, Estados Unidos Departamentu de Estadu no Organizaun Internasionál ba Migrasaun (IOM) liu husi Award No. S-SJTIP-15-GR-1006). Opiniaun no kontextu husi konteúdu ne'e rasik responsabiliza husi NGO Belun no la nesesáriamente refleta vizaun husi USAID, Governu Estados Unidos, Estados Unidos Departamentu de Estadu, IOM, Uniaun Europeia, UNDP, UNDA no Governu RDTL. Atu hetan informasaun barak liu tan kona-ba programa AtReS ka atu hare publikasaun seluk, favor vizita: <http://www.belun.tl>